

Inatsisartut suleriaasianni § 33 naapertorlugu aalajangiiffigisassatut siunnersuut manna Naalakkersuisut saqqummiuppaat:

Nunatsinni tunngaviusumik inatsiseqalernissaanik siunnersuusiortussamik isumalioqatigiissitamik pilersitsinissaq Inatsisartut Naalakkersuisunut piginnaatitsissummik tunniussinissaat siunertaralugu Inatsisartunut aalajangiiffissatut siunnersuut.
(Namminersornermut, Pinngortitamut, Avatangiisinut Nunaateqarnermullu Naalakkersuisoq)

Tunngavilersuutit

Inatsisartut 2015-imi aalajangernerminni paasinarsisipaat, Kalaallit Nunaanni inatsisinut tunngaviusussanik suliaqarneq, inatsisinut tunngaviusussanut isumalioqatigiissitami pisariaqartoq. ”Kalaallit Nunaanni inatsisinut tunngaviusussanut isumalioqatigiissitamik pilersitsinissamut nalunaarusiaq” naammassineqarnerani, Naalakkersuisut peqquneqarnertik malillugu, inatsisinut tunngaviusussanut isumalioqatigiissitamik pilersitsisoqassanersoq pillugu Inatsisartut aalajangiinissaannut tunngavissanik saqqummiipput.

Kalaallit Nunaanni inatsisinut tunngaviusussanut isumalioqatigiissitamik pilersitsisoqassappat, isumalioqatigiissitaq oqalliffissaalissaaq, Kalaallit Nunaanni inatsisinut tunngaviusussanut missingiutip ilusilersorneqarfissaa. Inuiaqatigiinni kalaallini inatsimmut tunngaviunerpaajusussamut missingiummik suliaqarnissaq matumani pineqarmat, aalajangiisussat inuiaqatigiinni oqartussaaqatigiilluni qinikkat – Inatsisartut – piginnaatitsinissaat pingaaruteqarpoq.

Inatsisinut tunngaviusussanut isumalioqatigiissitap sulinissaanut tunngaviusussaq tassaassaaq suliaqarneq allasimaffiat Inatsisartunit aalajangersarneqartoq. Nassuiaammi ”Kalaallit Nunaanni inatsisinut tunngaviusussanut isumalioqatigiissitamik pilersitsinissamut nalunaarusiaq” allaaserineqarpoq suliaqarneq allasimaffiat taanna qanoq isikkoqarsinnaanersoq, kisianni suliaqarneq allasimaffiata inaarutaasup iluarsinissaa, akuersissuteqarfiginissaa aalajangersarnissaalu Inatsisartut nammineerlutik aalajangiiffigisussaavaat.

Kalaallit Nunaanni inatsisinut tunngaviusussanik suliaqarneq marlunnik sukkassusilerlugu pisinnaanersoq, nassuiaammi nalilersorneqassasoq, Inatsisartut 2011-imi isumaliutissiisutaanni inassutigineqarpoq – taamaalilluni Kalaallit Nunaanni inatsisinut tunngaviusussanik, Namminersorlutik Oqartussat ataanni atuuttussamik aammalu Danmarkimi inatsimmut tunngaviusumut tapertaasussamik suliaqartoqassalluni, peqatigisaanillu Kalaallit Nunaat namminiilivittumik naalagaaffeqalerpat atuutilersussanik suliaqartoqassalluni. Nassuiaammi periarfissaq taanna allaaserineqarpoq, kiisalu inatsisinut tunngaviusussanut missingiummut, ulloq taanna inuiaat kalaallit namminiivittumik naalagaaffeqalerpata aatsaat atuutilernissamik siunertaqartumut periarfissaq allaaserineqarluni.

Inatsisartuni ataatsimiititaliaagallartumik, partiinit tamaginnit aallartitaqarfiusumik, aalajangiiffigisassatut siunnersuummik suliarinnissinnaasussamik, ilanngullugit inatsisinut tunngaviusussanut isumalioqatigiissitap pilersinneqarnissaa, suliaqarneq allasimaffiata ilusilersorneqarnissaa aammalu inatsisinut tunngaviusussanut isumalioqatigiissitap suliaqarneranik malinnaasinnaasussamik, pilersitsisoqassanersoq Inatsisartut nammineerlutik aalajangertussaavaat.

Taamaattoqassappat inatsisinut tunngaviusussanut missingiut allanneqassaaq. Nassuiaammi inassutigineqarpoq allattoqarfimmik, suliaassamik taassuminnga suliarinnittussamik, pilersitsisoqassasoq. Isumalioqatigiissitaq aamma sullinneqassaaq siunnersorneqassallunilu, taamaattumillu allattoqarfik tassunga tunngatinneqartoq, isumalioqatigiissitap ataatsimiinnermit siullermit kingullermit atugassaa, pilersinneqartariaqaraluartoq, nassuiaammi tikkuarneqarpoq.

Pisortanut aningaasaqarnikkut allaffissornikkullu sunniutaasussat

Ukiuni pingasuni suliaqarnerup ingerlanissaa nassuiaammi siunnerfigineqarpoq.

Siunnersuutigineqarpoq ukioq siulleq tassaassasoq ukioq pilersitsiviusoq, tassani allattoqarfik pilersinneqassalluni aammalu suliaakkiissutit allassimaffiat inissitsinneqassalluni. Taamaattoq tamanna ukioq iluitsoq tamakkerlugu sivisussuseqartariaqanngilaq. Taamaattumik 2017-imut Aningaasanut inatsisissatut siunnersuummut allannguutissatut siunnersuummik saqqummiussinissaq Naalakkersuisut toqqarpaat, tassani 2017-imi aamma 2018-imi inatsisinut tunngaviusussanut isumalioqatigiissitap ingerlataannut aammalu allattoqarfimmik 5,5 mio. koruunit immikkoortinneqarlutik.

Inuiaat kalaallit piffissap ingerlanerani namminiivittumik naalagaaffeqalerniarlutik aalajangissappata, aningaasaqarnikkut sunniutaasussat tassunga tunngassuteqartut, aalajangiiffigisassatut siunnersuummi imaluunniit nassuiaammi, ilanngunneqanngillat.

Inuussutissarsiortunut namminersortunut aningaasaqarnikkut allaffissornikkullu sunniutaasussat

Aalajangiiffigisassatut siunnersuut imminermini inuussutissarsiortunut namminersortunut aningaasaqarnikkut imaluunniit allaffissornikkut sunniuteqassanngilaq.

Inuiaat kalaallit piffissap ingerlanerani namminiivittumik naalagaaffeqalerniarlutik aalajangissappata, aningaasaqarnikkut sunniutaasussat tassunga tunngassuteqartut, aalajangiiffigisassatut siunnersuummi imaluunniit nassuiaammi, ilanngunneqanngillat.

Innuttaasunut ataasiakkaanut aningaasaqarnikkut allaffissornikkullu sunniutaasussat

Aalajangiiffigisassatut siunnersuut imminermini innuttaasunut aningaasaqarnikkut imaluunniit allaffissornikkut sunniuteqassanngilaq.

Inuiaat kalaallit piffissap ingerlanerani namminiivittumik naalagaaffeqalerniarlutik aalajangissappata, aningaasaqarnikkut sunniutaasussat tassunga tunngassuteqartut, aalajangiiffigisassatut siunnersuummi imaluunniit nassuiaammi, ilanngunneqanngillat.

Tusarniaaneq

Aalajangiiffigisassatut siunnersuut Naalakkersuisut Siulittaasuata Naalakkersuisoqarfianut aamma Aningaasaqarnermut Akileraartarnermullu Naalakkersuisoqarfimmik tusarniaassutigineqarpoq. Tusarniaanermut akissuteqaatit attuumassuteqarneri malillugit ilanngunneqarput.

Ilanngussat

Ilanngussaq 1. Kalaallit Nunaanni inatsisinut tunngaviusussanut isumalioqatigiissitamik pilersitsinissamat nalunaarussiaq.